

YAKUQ

Hun Kat é Laiká (James)

¹ Garai Gasang eq Yhumsîng Yesuq Hkrisduq é jùn, ngò Yakuq gi, byo myín tô é Israelaq raxe í myû lé, ngingón dang shit kyô kat lê.

*Lumjîng Myit Lé Chyam É Hkyô Eq Hpaqchyî
Byéng-yá*

² Ngá gumang wui ê, nungmoq é lumjîng myit lé chyam wú é hui jáng, shikut shirâng sé é myit jat nyi é lé, nungmoq sé nyi lê nghut mù, ³ wuîhke jamjau ajung jung lé htûng huí é hkûn, gaù jowò mó nghut nyi lê nghû luí myit yù keq. ⁴ Hau htoq agó, nungmoq banshoq gúm gumjup jup dut mù luí, haí le a langhpyut shoq, shikut shirang é myit gi, yhumsîng kut nyi é muzó lé wó lhoq gumjup nyi sháng gaq. ⁵ Nungmoq má rayuq yuq hpaqchyî byéng-yá langhpyut tô é nghut le gi, haù banshoq bang lé, mara a hun é za, agùn agó byî nyi é Garai Gasâng chyáng dúng nyi sháng gaq, haù jáng, Garai gi, yhang lé byi râ nghut lê. ⁶ Nghut kôlhang, lum shut é myit a bo é za, lumjîng é myit èq dúng nyi sháng gaq, hkâsu mù gâ le, lum shut é sù gi, laidûn èq hik luí toq lo é nhông mâ é wuîlhêng eq wuí nyi ri. ⁷ Haú yuq gi, Yhumsîng Garaí chyáng mâ é haí le wó yû râ su a ngam nyi sháng gaq. ⁸ Yhang gi, myit-kó xan sù nghut luí, yhâng é hkyô hkat hkgangmó má, mù htâng a nyang é sù nghut nyi ri.

Myùng Sû Eq Wó Sû

⁹ Myung é gumang hpó gi, waq toq huí é má, wó sù gi, lhoq nyhùm huí é má, gabú gumrong nyi sháng gaq. ¹⁰ Hkâsu mù gâ le, wó sù gi, wàhu banbó su woî byuq ló râ nghut lhê. ¹¹ Bui gi, nyé é lai èq toq lô jáng, haû wàhu nyhuí byuq ló mù, abó le yoq gyó byuq é eq, hau é yúng sâm pé gi, htên byuq é su; wó sù le haû eq rajung za, yhang kut nyi é muzó má woî byuq ló râ nghut lhê.

Gunglaú É Hkyô

¹² Wuîhke jamjau huí le, wó shikut shirang nyi sù gi, hkungsô wó nyî ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byî tô é danggidiq asak janmaú lé, wó yû râ nghut lhê.

¹³ Gunglaú huí é sù ó yuq nghut kôlhang, gunglaú huí é hkûn lé, "Garai Gasang, ngo lé gunglaú nyi ri." nghû luî, a tai sháng gaq, hkâsu mù gâ le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut.

¹⁴ Nghut kôlhang, ó yuq nghut le le, yhumsing é gungsho ô nau é dông, shuí lêng nghoq ló é nghut le gi, agúng alau hui bê. ¹⁵ Gungsho ô nau é hkyô kúm gi, zogûng dut jáng, mara lé hku htoq lo ri. Mara kô dîng jáng, shi é má jé râ nghut lhê.

¹⁶ Ngò chyitdap é gumang wuî ê, i-myt hkyô nghoq hkâ-nghoq nyî kó. ¹⁷ Gè réng é eq byíng jup é chyunghuq lhunglhang gi, ahtoq shut mâ é nghut mù luî, maubó gung pê* é Yhângwa Garaî chyáng mai gyó lo é nghut ri. Yhang gi, ahpuq

* **1:17** Maubó gung pé gâ é gi, bui, kyî, lhamó lé gâ lhê.

alik atau ahû dut é buishûm su dut râ a nghut.
 18 Yhang hpan tô é amyû pé má, nga-nhúng gi, sâng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luî, haû tengmán é mungdang mai, nga-nhúng lé hkû to bê nghut ri.

Gyo Yu É Eq Cháng Kut É Hkyô

19 Ngò chyitdap é gumang wuî ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang taí râ lé a hân sháng gaq; nhik-yo râ lé le hkâhân kó. 20 Hkâsu mù gâ le, byù nhik-yô é hkyô gi, Garai Gasang ô nau é dingmán é dông asak dui hkyô wó lhoq htoq râ a nghut. 21 Haû mù luî, achâq achyut é banshoq eq ladu laí agè ashop é pé lé lhoq san lhoq sêng pyám luî, nungmoq é i-myit lé wó hkyi yù râ matú, i-myit unghkaú má Garai Gasang hô tô é mungdang lé, nú-nhâm é myit èq hkam yu nyi keq.

22 Nungmoq gi, yhumsing gùng lé a mhaû pyám sháng gaq, haû mungdang lé wó gyô yu é bang za a nghut, haû dông châng kut é bang le nghut nyi sháng gaq. 23 Mungdang haû lé wó gyô yù mù, a châng kut é sù ó yuq le, yhumsing é gungdu lé myoqjâm má wú sù eq wuî ri. 24 Yhang gi, yhâng é gungdu lé wú yû mù, myoqdong lhik é eq, yhumsing gungdu hkâsu dut é lé tô-myhî pyâm ri. 25 Nga-nhúng lé wó lhoq lhut yu é gumjup é tarâ má, rago za wú tsuq nyi sù kúm gi, wó gyô yù mù tô-myhî pyâm é sù a nghut, muzó èq tûn shit é sù nghut é yanmai, haû yuq gi, yhang cháng kut é muzó má shimân jeju wó râ nghut lhê.

26 Byù rayuq yuq, "Ngò gi, noqkuq htûng lé lhoq dik sù nghut lhê." ga luî, myit to kôlhang, yhumsing

nhut shô lé a wó hkâng mù, yhumsing myit lé mhaû pyâm é nghut le gi, haû yuq é noqkuq htông gi, akôm za nghut nyi ri. ²⁷ Íwa Garai Gasâng é hí má sansêng é eq, râ é hkyô a bo é noqkuq htông gi, wuîhke jamjau huî é chuimó chuizô pé lé, châng wú garúm é hkyô eq, mingkan htoq mâ é achauq achyut é hkyô lé koi pyâm é hkyô nghut ri.

2

Myoqdong A Wó Hkyin Lhum

¹ Ngá é gumang wuî ê, hpungwup shingkang bo é nga-nhông é Yhumsîng Yesuq Hkrisduq lé lumjîng hkyô má, byu é myoqdong lé hkâhkyin lhum kó. ² Dangké, hîng loqchyop chyop luî, réng é mebu wut é sù rayuq eq ajeq amyha é mebu wut é asho awuî é sù rayuq gi, nungmoq é tarajong má wang lò kê é nghut le, ³ haû réng é mebu wut é sù lé, nungmoq lhom wú mù je hkunggâ é eq, "Shî aróng wó é jowò má zùng aq." dum, haû asho awuî é sù lé nghut jáng gi, "Mhó má yap to aq." haû su a nghut jáng, "Ngá é hkyî htâng má zùng aq." ga taí kê é nghut le gi, ⁴ nungmoq rayuq eq rayuq gamhkuî lhum luî, a ge é i-myit eq doqdân é bang dut lò bekô a nghut kó lú?

⁵ Ngò chyitdap é gumang wuî ê, gyô yù keq, lumjîng hkyô má wó sùt nyi luî, gidiq tô tô é mingdân é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuî é bang lé hkyin yù bê a nghut kó lú? ⁶ Nungmoq kúm gi, asho awuî é sù lé a hpau a yùm kut pyâm bekô nhung; wó bang sùt bang kúm gi, nungmoq lé zik zo mù luî, yhumsing

é loq èq yhang, tarâ tingnyâng shut she hkyut ló bekô, a nghut kó lú? ⁷ Nungmoq eq sêng é kô dik é mying lé lhang, yhangmoq yhang rhoi dang taí bum akô, a nghut kó lú?

⁸ Haû mù luî, Chyúmdang má, "Náng gûng lé nàng chyitdap é su, náng é chyangnâm mâ é bang lé le chyitdap aq." ✧ ga luî, taí tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyî bê. ⁹ Nghut kôlhang, byu é myoqdong lé nungmoq hkyin nyî kô é nghut le gi, nungmoq mara kut nyî gû nghut bê yanmai, haû tarâ lé shut é bang lé su tarâ jéyáng é huî nyî bekô râ nghut lhê. ¹⁰ Byù ó yuq nghut le le tarâ banshoq lé châng kôlhang, haú mâ é ralhum lhum lé shut pyám jáng gi, tarâ banshoq lé shut pyám sù dut byuq râ nghut lhê. ¹¹ Hkâsu mù gâ le, "Su-myi sulàng hkâlú." ✧ ga luî, hkang tô é sù gi, "Byù lé hkâsat." ✧ ga luî le, taí tô ashî. Nàng su-myi sulàng a lú kôlhang, byù sat é sù nghut le gi, tarâ lé shut é sù nghut bê.

¹² Haû su mù luî, nungmoq lé lhoq lhut kat é tarâ dông jéyáng doqdân é hui râ bang su, ru taí nyî keq; ru châng kut nyî keq. ¹³ Hkâsu mù gâ le, shogyo myit a bò sù gi, a shogyô é dông jéyáng doqdân é hui râ nghut lhê. Shogyo nhikmyîn é hkyô kúm gi, jéyáng doqdân é hkyô lé wó ông lut râ nghut lhê.

Lumjín Myit Eq Zui Sâi É Hkyô

¹⁴ Ngá gumang wuî ê, byù rayuq yuq, "Ngò gi, lumjín myit bo lhê." ga taí nyî kôlhang, muzó a bo lom é nghut le gi, haí akyû bò râ lú? Lumjín myit

✧ 2:8 Nhung 19:18

✧ 2:11 Htoq Ló 20:14

✧ 2:11 Htoq Ló

20:13

haû gi, yhang lé wó hkyi yù râ l hú? ¹⁵ Gumang, gu-nhá rayuq yuq a chîn dut nyi é eq, nyí wui é zoshuq langhpyut tô é nghut le, ¹⁶ nungmoq chyáng mâ é rayuq yuq gi, yhangmoq é gungsho má râ é hkyô haî le a byî é za, yhangmoq lé, "Nungmoq wut é gùng lúm sháng gaq, zô é ùng gyi sháng gaq, ngui ngui ngón ngón ló keq." ga taí é nghut le gi, hai akyû bò kó râ l hú? ¹⁷ Haû eq rajung za, lumjínng myit má muzó a bo é nghut le gi, shi é eq rajung za nghut nyi ri.

¹⁸ Dum rahkyô gi, "Nàng gi, lumjínng myit bo ri, ngò gi, muzo bo lhê. Muzó a bo é náng é lumjínng myit ngo lé tûn shit wú aq, haû hkûn, ngá muzó éq ngá lumjínng myit lé, nang lé ngò tûn shit râ nghut lhê." ga luî, rayuq yuq taí râ nghut lhê. ¹⁹ Garai Gasang rayuq za nghut é lé nàng lumjínng ri-nhung! Nghut bê, haû gi, jô é hkyô nghut nyi ri, nat gâng pé le haû su yhang lumjínng mù gyuq nán nyi akò nghut ri.

²⁰ Kyoq a bo é byù bam ê, lumjínng myit má muzó a bo le akôm za nghut é hkyô lé, nàng sé nau lhê a nghut l hú? ²¹ Nga-nhûng é Îwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saî é muzó mai dingmán é sù gâ é lé wó yû bê a nghut l hú? ²² Haû mù luî, yhâng é lumjínng myit gi, yhâng é muzó eq rahá za e ló é yanmai, lumjínng myit gi, jup byíng lo é lé, nàng wó myâng bê nghut ri. ²³ Haû su mù, "Abraham gi, Garai Gasang lé lumjínng é nghut mù luî, yhang lé dingmán sù ga són byi bê."* ga luî, kâ tô é Chyúmdang gi, dik to bê. Dum, yhang lé

* 2:23 Apûn 15:6

Garai Gasâng é buinùm hpó ga luí le myhíng byi bê.
²⁴ Haû mù luí, byù gi, lumjíng é myit èq baú za a nghut, zui saí é muzó èq mara hkyut san byi huí é lé, nungmoq bûn sê nyi akô.

²⁵ Haû eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat dông nhang kat pyâm é hkûn le, yhang zui saí é muzó mai dingmán é sù gâ é wó yû bê a nghut lhú?

²⁶ Haû su mù, gungdu má woi-nyí a bo le gi, shi é eq rajung za, haû lumjíng myit má muzó jizó a bo le gi, shí gû nghut bê nghut ri.

3

Mhé Wuí É Shô

¹ Ngá é gumang wui ê, byù myo myo sará hkâkut naû kó. Hkâsu mù gâ le, ngamoq sê é eq rajung za, sará pé gi, je riyhang htan é dông jéyáng doqđân é hui zo râ nghut lhê. ² Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkgang é sù nghut ri.

³ Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é dông wó cháng nhang lhê. ⁴ Haû mai gotû, wui-sanghpo pé lé wú wú keq, haû-í kô é sanghpo lé htan é laidûn èq mut é hui kôlhang, sanghpo hkâng sù gi, gyai tiq é sanghpo shap èq za, yhâng ô nau é dông, haú pé lé wó hkgang yu ri. ⁵ Haû eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik

zo gi, yoso mhanpúng mó lé wó nyé gyó nhang ri-nhung. ⁶ Shô haû gi, myi eq wuí nyi ri. Nga-nhông é gungsho má, shô haû gi, agè ashop é mingkan dut lò mù, nga-nhông é gungsho asak lé achag achyut dut nhâng luî, gungsho asak lé nyhê tuq kat ri. Haû gi, ngaraî myî èq nyhê tuq kat é nghut bê.

⁷ Dusak ajung jung, nghoq ahú hú, myi má yê é jung eq wuí hkaû má nyi jung banshoq gi, wó mhê yu é jung chyat nghut mù, byu pé gi, haû pé lé mhê yu nyi akô. ⁸ Nghut kôlhang, shô lé kúm gi, byù ó le a wó mhê yù kó nghut ri. Haû gi, apyî abat, agè ashop, uphkâng a wó é eq, shi é jung duq èq byíng tô é jung nghut nyi ri.

⁹ Nga-nhông gi, shô hau èq nga-nhông é Yhumsîng eq Íwa Garai lé hkya-on nyi lhê; hau èq za, Garai Gasâng é gunglhô đông hpan tô é waxâng zo wuí lé le nhîng pyâm nyi ri. ¹⁰ Nhut ralhum za mai, hkya-ôn é dang eq nhîng é dang htoq lo ri. Ngá é gumang wuí ê, haû su kut é gi, a gè. ¹¹ Wuibúm radong za mai, chuî nghâm é wuí eq hkô é wuí wó htoq râ lú? ¹² Ngá gumang wuí ê, maihpáng gâm mai tsanlun shi, tsibiyiq nuî mai maihpáng shi, wó zui râ lú? Haû eq rajung za, xô ngam é wuí gi, chuî nghâm é wuí lé wó lhoq htoq byi râ a nghut.

Ahtoq Mai Lo É Hpaqchyî

¹³ Nungmoq má, hpaqchyî byéng-yá bo é sù eq sê é dat é sù, ó nghut lhê lú? Haû yuq gi, yhang hpaqchyî bo é hkyô lé, hpaqchyî mai wó yu é, myit lhoq nyhum é hkyo èq, yhumsîng zui saî é ge é muzó đông tân shít nyî sháng gaq. ¹⁴ Nghut kôlhang, nungmoq é myit má ladu laî é manon é

i-myt eq, lú lhum bat zik é i-myt bo é nghut le gi, hkâ-nghutbun kó, haû tengmán hkyô lé le hkâ-mhaû pyám kó. ¹⁵ Haû sù é hpaqchyî byéng-yá kúm gi, mauhkûng htoq mai gyó lo é hpaqchyî byéng-yá a nghut, haû gi, myigùng htoq mâ é, gungsho ô nau é eq, nat é hpaqchyî byéng-yá chyat nghut nyi ri. ¹⁶ Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkûm nyi ri.

¹⁷ Mauhkûng htoq mâ é hpaqchyî byéng-yá kúm gi, sâng-hi awang má sansêng nyi ri; hau htâng má gi, nguingón hkyô lé ô nau é, myit nûm é, jino gyô é, shogyo nhikmyin sê é eq ge é ashi zuî nyi mù luî, gamhkui a bò, ahpuq alik a dut é eq, kut mhaú a sê é hpaqchyî byéng-yá nghut nyi ri. ¹⁸ Hau htoq agó, nguingón é hkyô dat sô xoq é bang gi, nguingón é shijí lé sân kat é bang nghut mù, ge é ashi wó yû kó râ nghut lhê.

4

Yhumsing Gùng Lé, Garai Gasâng Chyáng Ap To Râ Hkyô

¹ Nungmoq má gyè dut lhûm é eq mabyoq jishûm gi, hkâmai htoq lo é lhú? Nungmoq ahkaú má gungsho ô nau é hkyô pé ngón hkyô hô mù, majan zân lhûm é yanmai, dut htoq lo é a nghut kó lhú? ² Nungmoq yut yut myit ô nau nyi kôlhang, haí le a wó yû kó. Nungmoq sat nyi é eq manon nyi kôlhang, a wó yû kó. Nungmoq byoq lhûm nyi é eq majan htoq lhûm nyi kôlhang, haí le a wó yû kó; hkâsu mù gâ le, nungmoq, Garai Gasang lé a dung kô é yanmai nghut ri. ³ Nungmoq dung kôlhang, a

myang yù kó nghut ri; hkâsu mù gâ le, nungmoq é ngón kún hkyô má jai chûng langsâ pyám rà matú, shut é đông dúng nyi kô é yanmai nghut ri.

⁴ Su-myi sulàng lú é bang su gidiq a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lú? Haù mù luí, mingkan ô nau é hkyô eq buinùm dù naù sù ó nghut kôlhang, Garai Gasâng é gye nghut nyi ri. ⁵ Dum ralhum, nga-nhúng má Garai Gasang kat lhùng tô é woi-nyí gi, manon é myit lúng nyi ri ga luí, Chyúmdang má taí é gi, akôm nghut ri nghû, nungmoq myit ngam nyi akô lú? ⁶ Nghut kôlhang, Yhang gi, je kô é jeju ru byí nyi lhê. Haù eq rajung za, Chyúmdang má,

"Garai Gasang gi, nghutbùn é bang lé hkùm zing pyám kôlhang, myit lhoq nyhum é bang lé jeju byí ri."✧

ga taí tô ri.

⁷ Haù mù, Garai uphkan é a-ô má ru nyi nyi keq; Nat Tsadán lé hkùm tang pyám keq; haù hkùn, yhang nungmoq chyáng mai hpang byuq rà nghut lhê. ⁸ Garai Gasâng chyáng huí ê keq, haù hkùn, Yhang, nungmoq chyáng huí lé lô rà nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhikhum lé lhoq chyoì lhoq yúng to keq. Yudaq htùng đông loq lé chí san chí sêng pyám keq gâ é lichyúm gi, i-myt, gungdu lé lhoq san lhoq sêng pyám é lé gâ lhê. ⁹ Nungmoq gi, myit yón é, iyon yôn é eq ngaubyi ngau-nhap é kut nyí keq. Nungmoq é wuihâ é hkyô lé gi, iyon đông,

✧ 4:6 Sânghkyang 3:34

nungmoq é gabú é hkyô lé gi, yón kuq é đông htaî pyám keq. ¹⁰ Haû Yhumsîng Garaî é hí má i-myit lhoq nyhum nyi keq, haû hkûn, Yhang gi, nungmoq lé lhoq toq râ nghut lê.

¹¹ Gumang wuê ê, nungmoq yhangchang a ge é đông hkâtaî hpoî lhum kó. Yhumsing é yhanggu yhangmang lé a ge é đông taî hpoî nyi é sù, haû a nghut jâng, jéyáng é sù gi, haû tarâ lé a ge é đông taî hpoî nyi mù luí, jéyáng é sù nghut nyi ri. Haû tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri. ¹² Garai Gasang za tarâ byî tô é eq tarâ dara sù, wó hkyi yu é sù eq, wó lhoq htên é sù nghut nyi lê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lê lú?

Gyang Dang A Tai Ra Hkyô

¹³ "Ngamoq, hkû-nyí napmá ra-nyí nyí, wà rawà wà shut ê mù, haû má razàn kô ê nyí luí, hpugá wuiloq gá mù amyat wó myang yù râ." ga taî nyi é bang ê, gyô wú keq. ¹⁴ Napmá haî dut lô râ lé lhang, nungmoq gi, a sé ko. Nungmoq é asak gi, haî nghut nyi lê lú? Haû gi, razup rahtâng za htoq shit luí dum byuq byuq lô mù é, nghansoq eq rajung za nghut nyi ri. ¹⁵ Haû mù luí, nungmoq haû su ga taî nyi râ malaî gi, "Yhumsîng Garaî đông é nghut le gi, ngamoq le ru wó dui nyi mù, shî le, mhô le, wó kut râ nghut lê." nghu luí, wó taî râ nghut lê. ¹⁶ Ahkuí kúm gi, nungmoq é gyáng é dang đông gumrong nyi akô; haû su gumrong é hkyô banshoq gi, agè ashop é jung chyat nghut nyi ri. ¹⁷ Haû mù luí, ge é mù sê kut to luí, a kut é sù gi, mara kut sù dut bê nghut ri.

5

Sùt Wó Bang Lé Sidiq Byî É Dang

¹ Sùt wó é bang ê, gyo keq, nungmoq chyáng jé lé lô râ é wuîhke jamjau hkyo é yanmai, ngau garû nyî keq. ² Nungmoq é sutzè gi, htên bup byuq bê nghut ri; nungmoq é wutbu wutmè le manot èq zô pyám bê nghut ri. ³ Nungmoq é hîng eq ngùn má lháng, jogyik zuî byuq mù luî, haû jogyik gi, nungmoq é mara hkyam shut saksé dut byî é eq, nungmoq é gungsho lé myi su zô pyám râ nghut lhê. Nungmoq gi, jihtûm buinyî shí pé má, sutzè lé za hkong to bekô nhung! ⁴ Wú keq, nungmoq é yohtung dùng yò yam nhâng mù luî, ahpau a byî é za, nungmoq mhaú zô tô é ahpau pé garû nyî é htê pé eq, mù zui bang garû é htê pé lé gi, haû a-tsam dik shoq bo é Garai wó gyo byi bê nghut ri. ⁵ Nungmoq gi, myigùng htoq má hkik hkik hkâm hkâm wó nyî é eq, i-myt ô nau é đông ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri. ⁶ Haû dingmán é sù* lé, nungmoq mara hún mù, sat pyám bekô. Yhang kúm gi, nungmoq lé a lhom hkûm zing nghut ri.

Myit Hîng Hîng Hkam Jan Ra Râ Hkyô

⁷ Haû mù luî, gumang wuî ê, haû Yhumsîng dum jé lé é buinyî jé shoq myit hîng é èq lánng nyî keq ô! Hkyâm saí sù lé wú wú keq, yhang gi, myìhpún mai ahpau dán é ashi lé wó yû shoq ga mau mún eq wò htáng htâng é mau wo gyûn é jé shoq myit

* **5:6** Dingmán é sù gâ é danghkun lé, Chyúmlaiká ra-am má gi, dingmán é bang gâ ri.

hîng hîng lánng nyi ri. ⁸ Haû eq rajung za, nungmoq le, Yhumsîng Yesuq dum jé lé râ gi, chyâng lo nyi bê nghut é yanmai, myit hîng é èq, i-myit lé lhoq ging lhoq tîng to keq. ⁹ Gumang wui ê, nungmoq jéyáng a hui sháng gaq, nungmoq yhangchang hkâ-nyung nyâng lhûm nyi ko. Wú keq, Tarâ agyî gi, hkúmdong má jé nyi to bê nghut ri.

¹⁰ Gumang wui ê, haû Yhumsîng Garaî é myîng eq hko kyô é myiqhtoî pé wuîhke jamjau huî é hkûn, jân pyâm é myit lé, nungmoq gi, ge é alik agàn kut yû keq. ¹¹ Wú keq, shikut shirang é bang lé, nga-nhúng gi, hkungsô wó é bang nghu é nghut lhê. Yobaq hkâm jân é yanmai, Yhumsîng Garaî gi, yhang lé htâng má myo myo dum shimân byî é hkyô lé, nungmoq wó gyô wú bê nghut lhê. Haî mù gâ le, haû Yhumsîng Garaî gi, gyaî shogyo nhikmyîn é sù nghut nyi ri.

¹² Ngá é gumang wui ê, banshoq má ahkyak dik é gi, haî le le hkâdakâm kó. Mauhkûng lé a nghut jâng, myigùng lé lang luî le hkâdakâm kó. Dakam é dang gotû lé le hkâtaî nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghû za, taí keq.

Lumjîng Myit Eq Kyûdung Râ Hkyô

¹³ Nungmoq má rayuq yuq wuîhke jamjau huî é nghut le gi, kyûdûng nyi sháng gaq; rayuq yuq myit ngón nyi é nghut le gi, hkya-on mahkôn hkon nyi sháng gaq. ¹⁴ Nungmoq má rayuq yuq nôhpyo huî é nghut le gi, noqkuq hpúng mâ é nhik bô suwún wuî lé ji yù mù, haû bang gi, Yhumsîng Yesuq é myîng mai yhang lé xû but byi luî, kyûdung byi kó sháng gaq. ¹⁵ Haû su mù, lumjîng myit èq kyûdûng é dang

gi, haû nò sù lé lhoq gê luî, Yhumsîng Garai gi, haú yuq lé lhoq toq yû râ nghut lhê. Yhang gi, yubak mara kut shut é nghut kôlhang, hkyut pyám byî é hui râ nghut lhê. ¹⁶ Haû mù luî, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byî lhum nyi keq. Dîngmán su é kyûdung dang gi, wó dut nhâng râ a-tsam wum-o myo myo bo nyi ri.

¹⁷ Eliyaq gi, nga-nhúng su i-myt unghkaû bo é xângzo byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, sùm zan eq lhamó hkyuq hkyap tup myigùng htoq má mau a wò shoq dut byuq é nghut lhê.

¹⁸ Kyû dum dúng kat jáng, mauhkùng gi, maú wo hkyô kat byi mù, myigùng gi, yhâng é kyô shi mui shi lé lhoq htoq byî wú bê nghut lhê.

¹⁹ Ngá é gumang wui ê, nungmoq chyáng mâ é rayuq yuq, haû tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuí taû lo é nghut le kúm gi, ²⁰ haû shuí taû yù sù gi, yubak mara kut é sù lé, shut shai é hkyô mai tengmán hkyô shut shuí taû yù mù, myit woi-nyí lé shi é mai hkyi yù bê nghut é yanmai, yubak mara myo myo lé shuí nghop pyám byî é sù dut berâ lé, bûn nyi keq ô!

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee